

Frestg, frech e svizzer – in nov crimi


Tanner sa numna il nov cumissari litterar da la svizra tudestga

■ (anr/vi) «Tanner» è il titel da l'emprim cudesch dad Urs Schaub. Igl è in crimi ch'ins legia sco vata da zutger. Il cumissari Tanner è in da quests tips sin il qual las dunnas sgolan. Entant ch'el ha da schliar in cas pertutgant brutals mazzaments da mattettas, entaupa el bleras dunnas: amias, ex-amias, flommas novas, ina pura che vul el per ina notg ed ina giurista che pretenda dad el entamez la chapitala da Berna ch'el examineschia la qualidad e grondezza da sias tettas. Questa scena sa splega suenter che Tanner è i a mangiar cun la giurista ch'è stada pli baud ina da sias amias. Durant la tschavera s'accorscha ella ch'insatge n'è betg en urden cun Tanner. Uschiglio emprova el adina da sa far vitiers e da dumagnar ella enta letg. Tge ch'ella parescha adina cun pli u main bler success. Questa giada n'ha Tanner dentant naginas mustgas. La giurista vul savair daco e chava fin che Tanner dat tiers ch'el è gist ier s'inamurà. A la fin da la tschavera è la ex-amia bravamain tschuberlina. Dad ir atras las arcadas da Berna pretenda ella che Tanner examineschia sias tittas. El na vul betg, ma la giurista resoluta stat sut l'influenza da l'alcohol. Ella insista ed il privel ch'ella fetschia ina scena avant tut ils passants è grond. Tanner sto, gugent u navidas, tschiffar giuaden en il decolté ed affirmer che la grondezza e qualidad dals sains sajan gist uschè considerablas sco quellas da sia nova flomma. Quai è ina da las scenas scurilas che fan ord quest crimi insatge spezial. Adina puspè surpasa l'autur ils cunfins da la credibladad. El fa quai cun bler scharm, uschia ch'ins giauda talas passaschas.

Massa baras

Il cumissari Tanner fa sias retschertgas ordaifer ses uffizi. Avant blers onns han ses superiors suspendì el pervi d'in stgandal politic. Els han bandischà Tanner en il servetsch extern a Maroc. En l'Africa dal nord na possia il cumissari stinà far naginas tuppads, han ins sperà. Casualmain è là ina chasarina che Tanner ha a Marocco gist la tatta d'ina mattetta che vegn assassinada. La bara da la buoba chattan ins en ina valischa. L'assassin aveva taglià si il corp da la matta e suenter puspè cuntshada ensemen la membra. A Maroc chapita ina seria da tals mazzaments.

Tanner intervegn che dus murdaritschs sumegliants èn era capitads en l'Emmental. Il raquint cumenza en quel mument ch'il cumissari va a far vacanzas sin in bain puril en la vischnanca nua che quests assassinats èn vegnids cumess. El na di a nagin nagut davart ils motivs



Il frontispizi dal cudesch «Tanner» da Urs Schaub.

FOTO C. CADRUVI

da sia visita en la vischnanca idillica. Ma tscherts abitants remartgan l'arrivada da Tanner cun suspects. La dama dal casti da la regiun envida u citescha Tanner tar ella. La veglia signura examinescha l'inspectur. In liliputan ch'è il servient da la signura dat intgins tips a Tanner. Curt sissura vegn il liliputan mazzà. Sia mort vegn arranschada a moda bizara sco in suicidi. Igl è l'emprima mort da pliras che capiton durant las retschertgas da Tanner. Ils fils d'indizis mainan en circuls politics burgais ed en la scena extremista da dretga.

In nov cumissari svizzer

L'autur Urs Schaub ha stgaffi in nov cumissari svizzer, ina figura contemporana da la quala ins legiss gugent entiras ritschas da cudeschs. Tanner descriva la vita e cuntrada da l'Emmental, ma tanghescha era las atgnadads da citads sco Berna e Turitg.

Sco blers auturs da crimis, saja quai Donna Leon u Andrea Camillieri, fa era Urs Schaub ord ses cumissari in amatur da la litteratura classica. Tanner ama Shakespeare bunamain uschè fitg sco las dunnas. Ina tala inclinaziun na para betg fitg verdaivla tar in cumissari. Ella irritescha be.

Ils auturs da crimis vegnan anc savens spretschads e tegnids per scripturs da la segunda garnitura. Perquai na pon els forsa betg resister a la tentaziun d'engrondir lur raquints cun laschar esser ils cumissaris amatur da la litteratura. Quai na fiss betg necessari. Tanner fiss simpatic avunda era senza enconuschientschas litteraras. Anzi, el daven-tass, senza questas plaschentinias, anc blier pli vardaivel ed autentic.

Urs Schaub. «Tanner». Chasa editura Pendo. 386 paginas. Pretsch 38. Turitg 2003. ISBN 3-85842-565-6.